

東
華
續
錄

東華續錄

同治四十

臣王先謙敬編

臣張式恭恭校

十二月戊辰朔左宗棠奏臣督師入閩行抵浦城疊據稟報漳州龍巖南靖永定平和雲霄各城賊尙屯踞如故署陸路提督林文察十月十二日進剿漳郡踞逆副將惠壽營盤先陷林文察退紮玉洲十一月初三日漳郡踞逆出犯萬松關瑞香亭陸路各營又分股直撲水營林文察督軍接仗因後路被賊鈔襲兵勇敗潰林文察中槍陣亡其瑞香亭萬松關陸營同時失陷幸高連陞一軍初七日抵泉州據函稱逆賊勢極鴟張土匪從亂如歸泉廈岌岌高連陞率所部急趨同安以保泉廈尙未知能否到在賊前其黃少春劉明珍所部臣本飭其暫駐延平聽候調遣旋准撫臣來咨

已徑調赴省並調赴長泰據黃少春稟擬初八日前進此東路進兵情形也其龍巖州踞逆散布長汀連城甯洋各界時出窺伺臣咨劉典先將汀州連城甯洋一帶踞匪肅清以攻龍巖之北復調新署福建臬司王德榜由瑞金馳赴汀州擬俟其到後出汀州南趨上杭以攻龍巖之西須驅逆賊歸併一處嚴遏北竄彼此聯絡而後兵力乃敷分布見據劉典函報其前隊已抵甯化王德榜一軍由江西取道入閩計此時亦可馳抵汀界此西路進兵情形也其中路以延平爲最要蓋延平距省會四百里一水可通既可據上游以杜窺伺之萌復可策應龍漳諸軍爲犄角之計臣因中路空虛已飭隨行四營馳赴延平臣隨卽督率親兵續進抵延平後察看情形續報至前奉諭旨鮑超所部婁雲慶等由臣調遣此時尙無入閩消息林文察失利陣亡所部各營死傷潰逃情形容會

同撫臣徐宗幹查明後分別辦理 上諭議政王軍機大臣等聞

省漳州各城均爲賊踞林文察倉卒進剿中槍陣亡賊勢猖獗泉

廈危急高連陞一軍已抵泉州著左宗棠徐宗幹飛檄該署提督

迅率所部急趨同安務期到在賊前扼要防剿以保泉廈門戶並

飭調赴長泰之黃少春等軍合力兜剿穩慎進攻毋令賊蹤再行

滋蔓劉典前隊已抵汀界著卽照左宗棠所籌飛飭劉典所部先

將汀州連城甯洋一帶踞匪肅清進攻龍巖之北王德榜所部由

汀州南趨上杭進攻龍巖之西總期聯絡遏截妥籌分布將龍巖

踞逆悉數聚殲以免復行旁竄左宗棠因中路空虛先撥隨行四

營馳赴延平卽率親兵續進著俟抵延平後居中策應分籌遏剿

卽將辦理情形迅速奏聞漳龍一帶賊勢鴟張各軍分路環攻能

將該踞逆在閩境就地聚殲自屬上策惟恐該匪被剿窮蹙鋌而

走險則回竄江西旁窺粵境或潛蹤入海以致滋蔓難圖均在意計之中毛鴻賓郭嵩燾所派粵軍前已越境收復武平等城著仍懍遵前旨迅飭方耀等軍跟蹤追剿會合江西閩浙之軍進規漳郡殄除竄匪其閩粵濱海地方並著左宗棠徐宗幹毛鴻賓郭嵩燾撥兵嚴防儻任令匪蹤入海剽掠必惟該督等是問江西援閩之婁雲慶等軍見在行抵何處沈葆楨迅催前進並由左宗棠徐宗幹探明催提以厚兵力沈葆楨務當嚴飭江防諸軍嚴扼要隘以杜匪蹤回竄毋稍疏忽將此由六百里各諭令知之○准劉典開缺仍以二品頂帶幫辦左宗棠軍務以楊昌濬爲浙江按察使由鹽運使連○定查辦黑地章程○己巳諭內閣左宗棠奏請將北新關暫緩開設按月由釐捐酌撥以抵關稅一摺據稱浙省疊遭兵燹凋敝不堪市肆蕭條小民未能復業卽設法招徠瘡痍猶難遽

復若再竭澤而漁不但百貨翔貴商賈餬口無資卽此子遺之民生計益形窮蹙北新關試辦已逾三月徵數寥寥實因關書巡役等向來視爲利藪一經設關故態復萌藉端刁索以致商民視爲畏途裹足不前請將關稅暫停以順輿情等語所奏切中地方利弊浙省蹂躪已深正宜休養生息以培元氣若任令關書巡役人等擅作威福肆意誅求於國課毫無裨益而閭閻苦累甚深殊非體恤商賈之道著恆延將北新關暫緩開設關口各稅一概暫停抽收毋得任聽關書等恣憑別生枝節並著照左宗棠所擬於浙江各屬釐捐項下按月劃撥錢一萬串解交織造爲採辦一切工料之需另撥銀一千兩津貼織造司庫庫使等辦公及該衙門書吏匠役紙張飯食各項用費俟軍需一律告竣釐捐停止再行循照舊章辦理○諭議政王軍機大臣等駱秉章奏黔省苗號各匪

竄擾川邊截勦獲勝請飭貴州派兵夾擊一摺貴州苗號各匪突由赤水竄至敘永屬之了叉場知府劉嶽暘等分隊直擣賊殊死戰千總許長發等死之賊亦潰敗向馬蹶灘而奔該逆復糾約苗橫各匪分竄黑泥哨牽綴我師藩司劉嶽昭由合江抽撥兩營前往助勦斬擒悍賊數百名餘悉敗遁其桐梓綏陽等處匪勢亦尙披猖黔省與州省之敘永合江江津綦江南川以及彭浩西秀在在毗連羣賊環繞窺伺雖屢經川軍擊敗而後路無兜勦之師每由黔疆退遁若不亟籌截勦何以戢匪股而靖地方著勞崇光張亮基撥兵數千由遵義掃蕩而前與川軍兩面夾擊略秉章仍嚴飭劉嶽昭等不分畛域出境會勦速將盜藪剷除又安邊境將此由六百里各諭令知之○諭王通奏會勦番賊追獲營馬並塔爾寺僧團與回人構釁各摺片青海駐牧之汪什代克族番夥同曲

加洋冲等野番搶劫甘州營馬多匹經玉通調派弁勇會同扎薩克王公探蹤馳剿獲勝將馬匹全行追回辦理尙屬認真青海駐牧各族野番族人繁良莠不等玉通惟當設法羈縻嚴加防範毋任滋生事端塔爾寺阿家呼圖克圖與回眾構釁未肯散團玉通見派官紳馳往該寺並小南川各莊善爲排解卽著飭令該官紳妥慎辦理同情狡譎異常甘言就撫殊屬未可深恃仍著玉通妥籌防禦不得因該回暫時相安遂將團練全行遣撤致墮狡謀另片奏請飭甘肅撥解蒙古王公俸銀等語甘省軍情喫緊需餉浩繁恐無閒款可敷分撥本日已諭令沈桂芬由山西省迅籌撥解矣將此由四百里諭令知之○漕運總督吳棠奏請毋庸兼管江北事宜以符舊制得旨卽著將清淮善後事件次第舉辦曾國藩見須籌辦鄂豫等省軍務及金陵等處善後事宜其江北地方

公事一時尙難兼顧仍著吳棠管理俟江蘇善後完竣再行循照舊章辦理又奏遵旨查明劉際昌呈控唐守中各節湖田各自爲團不歸唐守中鈐制糾約攻寨焚掠等情毫無實據湖田總局係官設辦公之所並非唐守中所設唐守中之子唐錫齡捐納縣丞驗看到省係屬照章辦理魚臺境內並無匪徒滋擾見在清丈湖田編查戶籍並擬派員移駐以資彈壓批仍著會同李鴻章閻敬銘妥籌辦理○飭山西籌解青海蒙古郡王等歲支俸銀○廣江西九江府學額三名德化縣九名○庚午諭議政王軍機大臣等都興阿穆圖善奏連日移營獲勝攻克清水堡賊墟暨攻勦甯夏喫緊請飭慶昫謹慎防守各一摺慶昫奏查明常陞挫敗情形並近日賊情各摺片逆回盤踞清水堡老巢意在死守經都興阿抽撥兵勇滾營進紮穆圖善揮兵迎擊各軍士衝冒嚴寒力殊死戰

將清水堡大小賊墟同時攻克墟內敗竄之賊均向甯夏狂奔亟應乘此聲勢悉數殲除穆圖善各營已紮至金貴堡陳天佑及杜嘎爾馬隊連紮王格莊均距甯城已近著都興阿等督飭各軍節節進取將甯夏漢城迅速攻拔以靖賊氛惟逆回狡詐百出都興阿務飭將士穩慎進取不可墮其奸計致爲所乘糧糈採辦維艱已由都興阿飭提平羅縣生息銀三千兩購麥接濟又派員赴阿拉善旗磴口地方採買卽著照所擬妥速辦理以濟兵食擡槍火礮等件最爲攻城利器著都興阿酌量如果需用卽量爲調取毋致缺乏都興阿等攻勦甯夏喫緊兵力不敷圍攻誠恐賊匪被勦窮蹙奔竄滿城著慶昫督飭防兵穩固城守使賊無隙可乘萬不可掉以輕心致有疏失甯夏之賊窺伺滿城圖阻援軍復有金姓爲之主謀其計殊狡見在天寒凍結大兵已無阻滯著該將軍等

一鼓作氣竟此全功賊中主謀之金姓究係何人並著密速查明嚴拏務獲毋任漏網清水堡之戰將士受傷者甚多著都興阿查明打仗出力者擇優保奏杜嘎爾已調補甯夏副都統於該處操防一切事宜務須妥籌兼顧會同慶昫力圖整頓以副委任將此由六百里各諭令知之○以廣東肇慶勦辦髮逆生擒首逆戴梓潰賞總兵官卓興三代一品封典餘升敘有差○辛未以衍秀爲內閣學士由詹事遷○壬申諭議政王軍機大臣等張之萬奏髮捻各逆由鎮平分竄見派隊追擊並親赴舞陽布陣請飭催陳國瑞助勦各摺片前據僧格林沁奏賊竄鄧州官軍狂當經諭令該親王等整隊追擊茲據張之萬奏逆賊勢又猖獗聲撲鄧州城垣經馬步各軍擊退復向鎮平一帶竄擾刻下鎮平四南北三面均有賊蹤西北爲馬山口入山之路西南則由內鄉趨淅川頭頭是道

張之萬已行抵舞陽催王文行勇隊前進僧格林沁見在移紮南陽著卽整頓各軍會合痛勦務須就地殄除毋任再行四竄英翰及蔣凝學二軍能否酌調赴營著該親王察度妥調陳國瑞打仗向稱勇往據張之萬奏該總兵因病請假在光州調理見在諒已就痊著僧格林沁飛調該總兵迅赴前敵以資得力張之萬務當嚴飭湯聘珍等各營星夜繞由南召出賊之前扼賊北竄河陝之路並飛檄河陝汝地方整飭民團共資保衛王文行營隊催令卽日前進會合僧格林沁所派之軍合力痛擊毋任觀望賊勢駸駸西趨若一入山險又成不了之局劉蓉前奏興商止有五營而他處兵勇萬難抽動請責成湖北派兵前截後追該撫責任封圻自當於無可抽撥之中設法籌備方爲不負委任豈能盡諉鄰封袖手坐視著卽嚴飭地方官實力辦理團練以補官軍之不足仍於

附近營汛抽調兵勇擇要設防儻任令匪蹤闌入定惟該撫是問
均光鄖陽與鄧州鎮平接壤逼近賊氛著官文嚴飭鄖西一帶防
兵認真截剿毋得縱令西竄致滋延蔓見當河冰凍結之時賊蹤
若至陝汝卽易履冰過河沈桂芬務須嚴飭地方文武各員實力
巡防備豫不虞不得以寇氛尙遠稍涉大意將此由六百里各諭
令知之○諭徐宗幹奏漳州踞賊撲營官兵失利並高連陞等軍
陸續前進賊匪各懷猜忌各摺片漳州踞賊出城由好景山等處
包鈔萬松關瑞香亭官軍營盤林文察中傷陣歿曾玉明見飭該
署提督部將許忠標等管帶兵勇一千三百餘名扼守江東橋要
隘曾玉明仍在三汊河駐守見在高連陞已由同安前赴漳境黃
少春亦由泉州進紮漳城外之萬松關等處著左宗棠徐宗幹嚴
檄派出各軍協力埽蕩迅殄逆氛廓清疆圉福建陸路提督卽著

黃少春暫行署理以資統率賊黨各懷猜忌城內連日互鬪自相殘殺當此機有可乘如能迅速進兵尤爲事半功倍卽著該督撫相機辦理汀州龍巖各路康國器一軍駐紮離龍巖州城四十里之雁石地方張恆祥移紮長汀河田關鎮國扼守上杭連城劉典前隊已入汀境昨據左宗棠奏擬令劉典攻龍巖之北王德榜攻龍巖之西並以中路空虛先撥隨行四營馳赴延平此時劉典等計皆次第到防著左宗棠徐宗幹督飭閩浙官軍妥籌勦辦將失陷各城力圖規復務將此股逆匪就地殄除毋令再行回竄江西廣東或潛蹤入海復肆蔓延又成不了之局將此由六百里各諭令知之○予福建漳州陣亡署提督林文察祭葬世職加等遊擊李世進同知平懋儒等五員祭葬世職○飭福建實缺提鎮赴任○飭催各省撥解京餉○癸酉諭議政王軍機大臣等明誼奏差

旋到城接印日期詳籌善後事宜麟興等奏查明委員並無騷擾
違法並麟興奏交卸將軍印務見時不克建立界牌鄂博各一摺
明誼所稱豫行嚴飭明年立界大臣先行查勘明晰以便屆時建
立界牌鄂博不得稍有含混一節最關緊要至阿勒坦淖爾烏梁
海蒙古部落中如有真心內附者亟須擇地令該處人丁等移於
卡內住牧阿勒台烏梁海游牧內潛居之哈薩克人眾應往卡外
驅逐已與廣鳳商辦等語即照明誼等所籌妥爲辦理明年立界
後尤須各城將軍大臣相度地勢體察情形爲思患豫防之計所
有各城善後未盡事宜著明緒明誼麟興車林敦多布錫霖廣鳳
奎昌豫先督飭在事員弁隨地隨時密爲布置毋得稍有疏虞明
誼與俄所換條約內載換約後限二百四十日建立界牌鄂博計
其限期應在明年五月間此時如赴卡外辦理亦難剋期蒞事卽

著麟興於明春承領關防前往妥爲籌辦麟興車林敦多布所稱
據咨查明委員遇春等並無騷擾驛站及違法情事前於保恆惠
慶麟興廣鳳奎昌摺內先後批示勒令遇春等折回古城聽候差
委並將遇春革職此次所奏殊形曉瀆據稱遇春自揣膽略小欠
果斷未嫻行陣又不能熟悉地理恐誤軍務大事與麟興前次奏
保遇春管帶蒙兵緩急可恃之語先後如出兩人實屬自相矛盾
且遇春聞烏魯木齊滿城失陷不肯在古城帶兵其爲畏葸無能
已可概見乃麟興並不秉公參劾代爲百計掩飾以遂其庇護屬
員之私究竟是何居心麟興所稱恐與公事無益自請開缺語涉
負氣尤屬糊塗膽大回疆軍務孔亟正臣子竭力圖報之時麟興
借端陳請開缺隱售其規避之計該大臣清夜捫心能無負疚耶
麟興所請開缺之處著不准行將此由五百里各諭令知之○甲

戎諭蔣益澧籌築浙江海塘○予浙江殉難從九品顏亮建祠○
停河南例貢棗實○乙亥諭議政王軍機大臣等張集馨奏彙報
各路軍務會商籌辦情形及金縣失守咨催陶茂林赴省並曹克
忠攻克鹽關各摺片甘肅進兵形勢須步步防其回竄與陝省用
兵可以一意向前者迥不相侔雷正綰督軍進偪固原仍分兵回
顧邠長汧隴等處所辦甚合機宜見在雷正綰一軍已紮鸛哥黃
地方距固原城不遠卽著督率各營節節進紮分派馬隊繞出賊
前兩面夾擊迅拔堅城盡殲醜類曹克忠一軍力解秦州之圍並
攻克鹽關逆巢則蓮花城等處無所用其回顧正可騰出兵力相
機進剿應如何分兵夾擊之處著雷正綰酌度機宜妥籌調撥金
縣失守靖遠危急東則清水秤鈎諸肆南則阿干沙泥等鎮一片
逆氛蘭州省垣防守喫緊著陶茂林卽由會甯拔營赴省屯紮省

郊不必入城庶策應雕勦可期靈便其省城守禦事宜恩麟務當嚴密圖維不可稍涉大意張集馨擬由隆德靜甯一帶赴省此時計早行抵蘭垣卽著與恩麟妥籌防勦仍一面具奏所請簡查省城勇數及調回弁回兵出城助勦之策並著相機籌辦務令妥協合宜清水堡攻克後穆圖善等軍已偪甯夏並著都興阿穆圖善等恪遵前旨穩慎進取攻克郡城毋墮賊計川省援甘之兵前據駱秉章奏顏朝斌尙未回籍江忠濬未能出省已飭鶴齡帶兵一千五百名前赴都興阿軍營差遣等語當經諭令迅催前進本日復有寄諭駱秉章促令速行此起兵勇到甘後或令先在階州會勦踞逆或視何路緊要就近策應均著都興阿穆圖善雷正綰等妥籌調遣劉蓉前帶各營多係川兵見在蜀軍追賊入甘陝省防兵無多各營兵額亦因缺餉未補關中負天下形勢必須重兵固

守況髮捻西趨駸駸犯陝尤應亟籌防禦力顧疆圉張集馨所奏請於省城募兵三千名仍復總兵舊制並查明叛絕各產認佃無人者按兵授田收租代餉之議尙爲因時制宜豫籌備禦起見著劉蓉酌量情形實力辦理不得畏難苟安致防守空虛或啟賊匪窺伺之念正在寄諭閒據雷正綰奏曹克忠攻克鹽關情形一摺鹽關既克曹克忠兵力已無後顧之虞卽著飭令迅率所部由秦安北赴靜甯分路夾擊固原以期必克秦州防務已由曹克忠撥四營足資鎮撫其林之望統帶之兵卽飭馳赴階州會合川陝各軍迅速合圍攻剿毋令髮逆紛竄致成蔓延當此隆冬風雪北地苦寒士卒冒險衝鋒艱苦情形實深厯繫都興阿等務當激勵拊循俾將士人人用命肅清邊陲同膺懋賞將此由六百里諭知都興阿穆圖善雷正綰劉蓉並傳諭陶茂林恩麟張集馨知之○

諭崇實駱秉章奏西藏暨瞻對見在情形無須大員前往查辦一摺前因滿慶等奏汪曲結布病故已將羅布藏青饒汪曲賞給諾們罕名號協理商上事務並諭滿慶等勸令勤慎辦公務協輿諭著滿慶恩慶仍遵前旨飭令羅布藏青饒汪曲凡事秉公辦理以期伯俗相安俾藏地日臻靜謐景紋係特簡駐藏大臣責無旁貸著卽遵照前旨趕緊馳往西藏赴任將應辦事宜妥協辦理以重職守道員史致康赴打箭鑪安設臺站疏通大路崇實等派令隨同福濟赴藏該道員藉詞推諉而於各土司地方設站有無梗阻又不稟覆辦理殊未妥協史致康著暫行革職著崇實駱秉章責令速將瞻對之案辦理完結以贖前愆將此由五百里各諭令知之○撤辦理西藏事務福濟副都統銜以四品頂帶回旗○丙子諭內閣前因阜保奏遵查景綸等參款未能徹底根究當諭令該

侍郎再行詳查辦理茲據阜保奏查辦事件未能詳細自請議處並景綸麟瑞奏續行查出庫吏那移款項據實檢舉各一摺阜保於特旨交查之案宜如何審慎周詳以期水落石出乃於所查各款第求迅速了事並不悉心研究卽如景綸等本日所奏續行查出筆帖式巴克喜那移庫款已收未交銀二萬六千三十五兩零票銀五千二百五十七兩錢九萬四千四百餘串之多該侍郎於上次奏結時亦並未詳晰查出實屬辦理草率阜保著交部議處近來欽派大臣於交查案件往往存避重就輕之心將就完結不肯認真究辦積習相沿牢不可破何以嚴旌別而飭紀綱嗣後遇有交查事件派出之員務當破除情面秉公確查毋得稍涉含混致負朝廷委任○諭議政王軍機大臣等景綸等奏續行查出庫吏那移款項已收未交見在查封變抵及巴克喜中途病斃各摺

片阜保奏查辦事件未能詳細自請議處一摺此項銀錢各項何以阜保在吉林時竟未查出實在數目其爲草率含混急圖了事已可概見本日已明降諭旨將阜保交部議處著該侍郎卽行前赴吉林署任按照摺內數目確查並將巴克喜所開店當等鋪及家產一併變價備抵以重庫款案內未盡確實各情著懷遵前次諭旨將未盡各事宜逐件清釐不得再有因循含混致干重咎常明明祿巴克喜解赴奉天聽審巴克喜行抵蒐登站因病身死巴克喜係虧那庫款緊要人犯阜保既奉命查辦本不應提至奉天見在該革員中途病斃是否實係因病抑或另有別情著阜保親自查驗明確據實具奏景綸另奏吉林辦理海防借墊款項以開荒地捐一款爲歸補經費之用據經手之撤任協領明祿彙具用款稟報等語著阜保認真查覈毋令浮冒景綸摺一件片二件均

著發給阜保閱看前已有旨將景綸交部嚴加議處麟瑞交部議處此次景綸等自請治罪之處著阜保將全案訊明具奏時聲明請旨將此諭令知之○諭張之萬奏賊由南召北趨魯山窺伺河汝見在會籌進剿一摺豫省髮捻各逆由鎮平紛竄擾及裕州之趙河等處該逆因馬山口有兵扼守分股來撲疊經防軍擊卻未得逞志遂相率北趨由南陽之石橋疾趨南召直薄魯山縣城全股在近城一帶游弋窺伺河汝僧格林沁張之萬先後督軍馳紮葉縣見將臨勝四營及新募飛虎一營撥歸張曜宋慶管帶刻日進剿卽著飭令該總兵等整飭諸軍取道前進並飛檄王文行勇隊跟蹤躡剿魯山西北皆山直接河汝務須嚴飭張曜等軍繞出賊前合力兜擊毋令賊蹤竄入山險致滋蔓延僧格林沁所部馬隊日夜奔馳疲乏已極著俟暫行休息兵力稍紓卽由該親王統

帶前赴邾汝相機籌度會合張曜等軍穩慎進攻其扼紫鎮平之湯聘珍崔廷桂等數營見已落在賊後應由何路調赴前敵截剿並豫省本境有可添調之兵應行酌量調撥並著僧格林沁張之萬妥籌速辦曾國藩前派分赴楚豫之劉連捷劉銘傳等軍曾否到防楚省見無賊蹤著曾國藩李鴻章迅檄劉連捷等所部星速馳赴豫境毋許再有稽延官文所部成大吉李成謀諸軍自應遵旨飛速撥赴豫省助剿卽著僧格林沁檄調前進分投堵剿陳國瑞因病請假諒已就痊卽著僧格林沁調赴前敵並飛檄皖省之英翰郭寶昌蔣凝學各軍迅赴南召魯山一帶前截後追以杜紛竄喬松年卽催令英翰等速行入豫毋稍延緩以上各軍均歸僧格林沁節制調遣卽著該大臣隨時檄調如將士有畛域之見及赴調遲延者均著嚴參該處山路居多步隊尤爲得力該大臣務

須多爲之備加意慎重以防意外之失該逆有入山過冬再竄陝境之說見屆冬令黃河三門冰結成橋匪蹤易於渡河秦晉毗境防務均形喫重著沈桂芬懷遵前旨嚴飭河防文武實力堵禦應否添兵協守以備不虞並應熟籌妥辦萬勿以寇氛尙遠稍涉疏虞陝省毗連河汝等處要隘並著劉蓉派兵嚴防仍遵前旨速飭地方官整飭民團妥籌守禦陝省防兵僅有興商數營較形單薄如賊勢西趨陝疆並著官文酌派勁兵越境兜擊毋得稍分畛域豫省扼守馬山口兵隊見係何人統帶仍著張之萬飭令擇要扼紮以杜匪黨回竄爭據山險之路昨據御史陳廷經奏緣營水師廢弛請飭整頓營伍製造火器一摺所陳各節是否可行並著曾國藩李鴻章會同商酌奏明辦理陳廷經原摺著鈔給曾國藩李鴻章閱看將此由六百里各諭令知之○丁丑諭內閣戶部奏河

南省應豁節年民欠錢糧延未奏請豁免請勒限飭催一摺前於咸豐十一年及同治元年疊降諭旨將各省歷年積欠錢糧並咸豐九年以前民欠倉糧一律豁免茲據戶部奏稱河南省應豁各案至今尙未具奏且查咸豐九年以前奏銷案內節年應題之件已有一百三十餘件之多皆因該省應豁銀兩未經奏報不能與吏部會議以致應題之案愈積愈多等語朝廷豁免民欠原冀恩膏速沛普及窮黎乃該省奉旨數年之久尙未辦理卽謂調驗句稽有需時日亦不應如此遲滯更難保無不肖州縣重複徵收胥吏從中積壓等弊著張之萬飭令藩司以此次接到部文之日起限一箇月迅將奏銷冊報咸豐九年以前節年民欠各項錢糧覆加確覈開單奏請豁免如有已徵未解之項勒令按限提清於奏豁單內扣除不准稍有含混以昭實惠而清積牘○諭富明阿奏

請將江甯京口陣亡殉難大員及兵丁婦女等分別建祠等語咸豐三年粵匪竄擾江甯省城前任江甯將軍祥厚副都統霍隆武及八旗協佐各官或力竭捐軀或臨難自盡同時陣亡殉難者文武各官計三百餘員兵丁婦女不下三萬餘人祥厚之子恩綸恩麟暨家丁巴彥石套僕婦李氏楊氏等六名口亦同時殉難又自是年逆匪東竄後京口八旗官兵或在城殉難或隨勦陣亡歷年以來共計官兵三百九十九員名盡節婦女四百八口又前任江甯將軍蘇普通阿等均以統兵大員勦賊陣亡或以積勞病故見當江甯克復追念死事諸臣及該兵丁婦女等忠義奮發節烈凜然自應分別建祠以隆廟祀所有前任江甯將軍祥厚副都統霍隆武及江甯京口陣亡殉難之官兵婦女卽著於江甯京口兩處旗營中分建昭忠節烈各專祠其前任江甯將軍蘇普通阿和春

署江甯將軍京口副都統巴棟阿京口副都統長安綢闊海全及
祥厚之子恩綸等六名口均著一併附祀以慰忠魂至京口未經
請卹之兵丁婦女七百餘名口並著交部分別旌卹附祀以彰忠
節○戊寅諭議政王軍機大臣等常清明緒奏伊犁城圍緊急懇
請迅速撥兵一摺庫爾喀喇烏蘇被賊攻破後伊犁北關回匪數
千登時起事攻撲城垣官兵甫經接仗全行敗退領隊大臣托克
托奈失利陣亡所屬各城亦均淪陷金頂寺回眾數萬見已變亂
當此賊氛四起伊犁城垣孤懸岌岌難保且存城之兵不過千餘
而察哈爾厄魯特蒙古官兵又屢調回應尤有戰守兩難之勢明
緒見因俄國貿易圈地爲賊擾占行文西悉畢爾衙門暫借俄兵
相助亦是急則治標之意尙屬可行第道路遙遠文報能否達到
俄兵能否前來均未可定近年蘇省勦賊亦參用英法各國兵力

幸李鴻章尙能委曲聯絡卽如常勝一軍雖係外國兵官教練仍隸以中國兵勇且由中國派員會同統帶是以所向有功左宗棠勦辦浙賊於攻復甯紹等城亦用此法伊犁借助俄兵若能藉生力軍猛鷲之氣以振我軍積餒之心自可事半功倍儻自強無策惟鄰國之命是聽無論未必有功卽使真能奏效而主客勢殊亦屬失計明緒惟當以江浙辦法爲準慎始圖終事事熟籌妥辦若能保全伊犁將附近各城克復卽以厚貲犒勞亦所不惜惟在明緒等操縱得宜方爲妥善都興阿穆圖善等勦辦甘肅回匪漸可肅清本日已寄諭該將軍等迅速進兵殄滅甘回以便騰出兵力出關助勦大兵未到以先明緒當就見有兵力聯絡俄兵力圖掃蕩旣據常清奏稱明緒抵伊犁後事無鉅細悉合機宜軍民藉爲長城之固諒必能激勵人心固守待援以副委任常清稱明緒宜

錫以極品之榮等語自係尙未接奉明緒簡任將軍之旨明緒果能奮勉圖功朝廷自當更加恩賚也將此由六百里諭令知之○諭據明緒等奏庫爾喀喇烏蘇城池於十月間被回匪攻破伊犁北關回匪數千登時起事攻撲城垣接仗失利其巴燕岱各城紛紛變亂道途梗塞該處存兵無多勢成坐困請速派大員帶兵救援等語新疆北路自烏魯木齊失陷後伊犁已成孤立之勢見在賊匪逼近該城勢極蔓延情形更爲危急此時古城以東道路尙能疏通內地精兵若能迅速出關進剿尙可保全完善徐圖攻取儻再任其滋蔓必更無從措手前據都興阿穆圖善奏攻克清水堡賊巢後官軍已進偏甯夏著卽乘此聲威督率各軍奮力進剿攻拔城池將甯夏一帶地方廓清能早一日蕆事卽可早一日出關助剿以紓朝廷西顧之憂楊岳斌募勇一事曾否辦理就緒此

時西路軍情萬緊尤應力顧大局剋日選募成軍統帶赴甘俾都興阿穆圖善之兵即可早日騰出鼓行而西以維危局駱秉章所派援甘兵一千五百名由鶴齡統帶前往著卽催令剋日趨行迅赴都興阿軍營聽候調遣毋得遷延時日致誤事機將此由六百里各諭令知之○復以兆琛爲湖南按察使○己卯諭議政王軍機大臣等保恆惠慶奏分兵勦匪失利請調烏科官兵救援一摺迪化回匪在阜康一帶滋擾欲攻濟城吐魯番竄匪殺傷穆家地山口民勇在奇台三箇泉地方盤踞木壘河街市被賊焚燒濟木薩兵勇接仗失利蒙兵未曾接仗先自潰散各項兵勇或接仗卽挫或不戰先潰兵勇緩急難恃至此致匪勢日益猖獗殊堪痛恨迪化陷後賊踞適中之地肆出滋擾前諭功訥布等駐紮濟木薩待援兵一到進復烏城此次接仗失利非但收復烏垣毫無把握

將來匪勢日漸東趨何以禦之前因烏科二城蒙兵不能得力已諭令嗣後不必勉強湊調見在賊氛愈急關外除蒙古以外更無可調之兵著明誼麟興車林敦多布廣鳳奎昌等於烏科二城挑選蒙古精壯官兵若干名聽候調遣此時餉項缺乏如別無可籌之款卽由解到古城八萬餉銀內提出若干兩以願急需下餘之餉卽行派員解赴古城俾資散放聯捷簡放伊犁參贊大臣昨據劉長佑奏該大臣已接到兵部勘合並烏拉票於十一月十七日起程著卽星速前進兼程出關馳赴烏科兩城將明誼等選出蒙古兵統帶前往古城助剿該大臣曾在直東帶兵有年身經戰陣務須妥籌調度痛掃狂氛聯捷出關必經由察哈爾地方一俟行抵該城著阿克敦布廉至催令趕緊進發不准片刻逗遛文祺前奏飭令郡王伯錫爾派纏頭回兵會同巴里坤滿漢官兵搜滅餘

匪見在文祺復有自帶纏頭回兵來古進剿之說著卽統兵前進相機勦辦以振軍威哈密防務卽責成扎克當阿會同伯錫爾慎固封守嚴密圖維母稍大意昨據常清明緒奏賊已逼近伊犁逆氛愈熾紛竄更屬堪虞各援兵未到之先保恆惠慶務當就有兵力妥爲拊循勤加激勵分投防剿以衛地方將此由六百里各諭令知之○庚辰諭內閣朕叔祖惠親王綿愉秉性端凝持躬謹慎自幼仰承 皇曾祖仁宗睿皇帝恩眷道光年間蒙 皇祖宣宗成皇帝疊加優異晉封親王我 皇考文宗顯皇帝誼篤親親益隆敬禮咸豐三年簡授奉命大將軍督辦巡防事宜凡遇內廷召對特免叩拜紫禁城內賞坐四人轎王厯事 三朝始終罔懈於管理旗營及一切差使俱能恪恭盡職懋著勤勞朕御極後復蒙兩宮 皇太后以王輩分最尊 特命在弘德殿照料俾資矜

式並停止一切應派差使以示優崇本年三月間染患痰證步履維艱屢經溫諭給假調理七月間復因王病體未痊准開各項差使之缺加恩毋庸停俸仍在內廷及弘德殿行走並諭令自行酌量進內不必拘定日期方冀珍攝如恆舊病漸愈遽聞薨逝震悼實深昨已賞給陀羅經被派悼親王前往奠醑著再派恭親王帶領侍衛十員代朕前往賜奠加恩於例賞外加賞銀五千兩經理喪事任內一切處分悉予開復所有飾終典禮著各該衙門察例具奏伊子奉恩鎮國公奕詳於百日孝滿後卽著承襲郡王該衙門不必帶領引見尋議上賜祭葬諡曰端○諭朕叔祖惠親王綿愉薨逝本日業經降旨派恭親王帶領侍衛代朕前往賜奠茲奉慈安皇太后 慈禧皇太后懿旨以惠親王輩分最尊歷受

三朝恩眷朕御極以來王在弘德殿行走朝夕照料深慰 慈懷

適因舊病淹纏遽爾薨逝我兩宮

皇太后披覽遺章深爲悲惋

命朕於十七日親臨賜奠用申

慈惻以示優崇○諭議政王

軍機大臣等前因都察院奏江蘇士民殷自芳等呈請挑濬山鹽二縣境內市河十字等河以收灌溉宣洩之利當諭令曾國藩吳棠李鴻章酌覈辦理茲據該衙門奏稱鹽城士民趙含生等遣抱告周郁文呈訴殷自芳等捏撰水利山陽縣之市河十字等河並不在鹽城境內一經挑築必致阻遏水道鹽邑全受其害等情趙含生等所控各節與從前殷自芳等呈訴情形彼此各執一詞均難憑信其市河十字等河究竟應否挑濬之處著曾國藩吳棠李鴻章相度地宜確切查明酌覈辦理原呈所稱殷自芳等並不遵旨請查遽行斂錢興工之處是否確實尤應徹底根究並著該督撫等一併查明具奏原呈一件著鈔給閱看圖併發將此各諭令

知之尋奏確查志乘並採訪耆民公論市河十字等河由山陽流入鹽城達馬家蕩入海下游淤阻則有害民田殷自芳等稟由府縣籌議挑濬經臣吳棠親詣勘明委員酌度另埋涵洞引運河之水以益來源疏濬尾閘以免阻遏見在工程已竣數千頃民田藉資灌溉於地方水利不無裨益至酌捐經費係另舉殷實董事經理殷自芳等並無斂費情事趙含生等不明縣志控出懷疑已經到案具結尙非固執應免置議報聞○諭吳棠奏東南軍務大定擬試辦河運等語據稱江北各屬均以河運爲便惟停運有年漕艘久廢若設法雇用民船慮難鈐束並沿河一路絳隄埝壩浮送能否無虞亦難逆料見擬於清淮軍需捐款內動銀購米三萬石解赴通倉試行河運等情具見該漕督心存大局辦事認真江北各屬距滬較遠如與蘇浙江廣糧艘一律由上海轉運由北而南

殊多周折著照吳棠所請卽行採買米石雇備民船由河道運送
通倉所有轉運事宜並江省應行經過河道均著飭令該地方官
妥速經理一俟議定章程卽行具奏並著鄭敦謹將糧艘經過河
路之緯隄牘壩有無應行修整挑濬卽飭沿途管河官弁一體迅
籌備辦用利運行如能挽行無滯來歲江北新漕卽由吳棠等仿
照辦理以復河運成規該督等諒能實力興辦不至徒託空言稍
涉畏難也吳棠片著鈔給鄭敦謹閱看將此各諭令知之○諭官
文奏髮捻竄豫派軍馳赴鄧州助剿及援甘楚軍起程日期劉連
捷令紮英霍六安各摺片逆匪由鄧州至鎮平相率北趨見由南
召奔魯山窺伺河汝疊經降旨令官文派兵赴豫助剿茲據官文
奏稱已令常星阿蘇倫保溫德勒克西姜玉順藍斯明等隨同僧
格林沁出境分追見又添派富森保楊朝林梁洪勝等內外夾擊

又派成大吉由老河口均光一路迎頭包襲兼顧楚境所籌均尙周妥見在賊眾北趨若不迎頭攔截恐一入河汝將爲秦晉之患著卽催令常星阿等星馳前進歸僧格林沁調遣不得稍涉觀望致干咎戾楚省要隘應辦防務卽責成江長貴李成謀等妥爲經理以防回竄劉連捷一軍自可無庸赴楚惟該督飭令駐紮英霍六安潛太一帶去賊太遠以有用之兵置之無用之地殊爲可惜著僧格林沁遵照疊次諭旨檄調赴豫並催調劉銘傳等軍星速入豫派赴前敵截勦以厚兵力蔣凝學一軍見紮商城並著僧格林沁酌量調遣此軍係派赴甘省之兵著俟豫省賊勢稍平仍令該道帶兵赴甘據官文奏稱該道每月需餉六萬兩因楚省支款繁多力有未逮不得不藉舊欠接濟新餉議定自同治四年正月起每月由湖北補發欠餉銀二萬兩其餘銀四萬兩該道行抵陝

西卽由陝西籌給行抵甘肅卽由甘肅籌給等語著劉蓉恩麟於蔣凝學一軍到境時照數接濟劉蓉並於荊子關設立分局藉收轉運以利師行將此由六百里諭知僧格林沁官文劉蓉並傳諭恩麟知之○官文奏查道員蔣凝學一軍自皖援鄂所部僅三千數百人屢次戰捷以少勝多實屬忠勇奮發該營參將劉維楨偵知羣賊中惟陳德才爲最悍而陳德才黨與又以吳青汰爲最悍蔣凝學遂令劉維楨宣布 皇仁暗施反間該道仍率部晝夜窮追十月初九日追至霍山縣屬之長嶺菴賊目吳青汰率三萬餘人因劉維楨以求降蔣凝學卽派知府蔣澤澐率各營排陣要隘遣遊擊熊顯榮從九品何林亨馳入賊中察其真僞首逆陳德才卽親率大股來衝蔣凝學激勵吳青汰等勦賊立功吳青汰卽與屈忠星等反戈殺賊蔣澤澐同總兵李揚隆等乘勢痛勦擒斬極

多是夜賊目范立川帶同陳漢汰周添聯等二萬餘人來降倪澄漢及陳得才部黨高啟城等見吳青汰范立川等反正相繼來歸者又五萬餘人蔣凝學馭之以權懷之以恩各降眾均帖然心服陸續遣回者共十一萬一千三百餘人畱精壯在營效力者三千餘人陳得才自度不支服毒自盡又經范立川等掘獲屍身解至僧格林沁行營戮屍傳首示眾實足大快人心所有出力各員應請分別獎勵至蔣凝學一軍見經僧格林沁飭赴商城聽候調遣定於十一月二十八日拔營星夜馳往臣已於江漢關稅項內發給銀七萬兩又購買米三千石解赴襄陽備領以利軍行奏入賞總兵官李揚隆從一品封典總兵官袁秀林參將劉維楨巴圖魯名號投誠賊目吳清泰等藍翎餘加銜升敘有差○予浙江殉難道員胡元博等祭葬世職○辛巳賞八旗兵丁半月錢糧○壬

午諭內閣吏部奏請將滿洲蒙古郎中升途量予變通一招據稱滿洲蒙古郎中向無截取知府之例其有勞績出力者向准保舉京堂嗣經奏定章程滿漢人員無論何項勞績概不准保舉京堂近來各該衙門因勞績出力以知府京堂保舉之滿洲蒙古郎中均經按照新章另覈請獎請酌量變通嗣後滿洲蒙古郎中勞績出力除京堂停止保舉外比照漢郎中之例准其保舉知府歸部選用等語所奏雖爲鼓勵人材起見惟思各衙門滿洲蒙古人員或保送御史或京察簡放道府何至因不准截取知府保舉京堂遂無上進之路設因尋常勞績概准保舉知府是雖避截取之名而實開一倖進之途且漢員截取尙須歷俸二年而此項人員轉得隨時保舉恐適啟屬員冀倖之心不可不於變通之中仍示以限制嗣後滿洲蒙古郎中如實有才具出眾勞績較優堪勝外任

者方准酌保知府歸部選用如係尋常勞績概不得率行奏保仍著該部立定章程以歸畫一至所保人員儻有前後易轍或犯貪污惡劣及一切私罪者除本員治罪外必將濫保之堂官從重懲處決不寬貸○諭議政王軍機大臣等據沈葆楨奏接准鮑超咨稱擬帶所部八千三百名另調川兵四千募川省步勇數千酌添馬隊統計新舊各營月需餉十餘萬兩請飭各省酌撥協餉等語新疆各城變亂勢甚猖獗非有內地大枝勁兵出關難資剿辦鮑超勇略過人聲威素著必能立功邊域迅掃逆氛該提督以塞外用兵必須厚集擬帶萬餘人前往方能制勝自係實在情形惟籌兵必先籌餉庶幾士飽馬騰所向克捷新疆地處沙漠餉無所出從前用兵皆由各省轉運接濟此次鮑超所帶兵勇月餉計需十餘萬須合各省之力協濟俾免缺乏著官文曾國藩都興阿駱秉

章毛鴻賓李鴻章吳昌壽憚世臨劉蓉閻敬銘沈桂芬郭嵩燾恩
麟體察情形每月可以協撥若干均各酌定數目奏明辦理卽按
月如數撥解不得宕延此係緊要兵精眾擎易舉該督等總須顧
全大局寬爲籌備毋許稍分畛域藉口推諉也將此由五百里諭
知官文曾國藩都興阿駱秉章章毛鴻賓李鴻章吳昌壽憚世臨劉
蓉閻敬銘沈桂芬郭嵩燾並傳諭鮑超恩麟知之○諭沈葆楨奏
甘肅福建軍情均極喫緊霆營兵不宜分並將鮑超原咨鈔錄呈
覽一摺所稱關外平沙廣漠利在用眾閩地山重水複利在用奇
西陲軍務緊急鮑超宜統全部西行方可獨當一面第閩事大棘
江防亦警若欲肅清濂侍各逆亦須霆營全部兵力方能摧陷廓
清等語尙屬實在情形惟新疆自庫爾喀喇烏蘇失陷伊犁被圍
情形萬分岌岌都興阿穆圖善雷正綰等分勦甯夏固原之賊正

在得手未能遽爾分兵非另撥大枝勁旅迅速西行則出關剿賊之說幾成虛語況閩省餘氛已由左宗棠三路援剿鮑超又分兵萬餘人交婁雲慶等統帶會剿閩賊兵力不爲不厚自可無須再留鮑超全部致增朝廷西顧之憂著曾國藩沈葆楨傳知該提督於假期一滿卽日率領所部宋國永等各軍由川起程入甘節節掃蕩早日出關相機進剿婁雲慶等軍俟閩賊殄滅後仍著前赴鮑超軍營聽候調遣鮑超請撥川省制兵四千名並由川中招募步勇數千名之處著駱秉章卽日妥籌辦理毋稍遲誤致滯師行沙漠地方平原曠野非馬隊車營相輔而行不克有濟應如何添設馬隊及入甘購馬之處著鮑超咨商曾國藩斟酌情形實力籌辦其霆營欠餉並著沈葆楨迅籌清理俾資行費將此由六百里諭知曾國藩駱秉章沈葆楨並傳諭鮑超知之○諭都興阿穆圖

善奏籌防回捻各逆竄擾陝疆並見在甯夏辦理情形暨西甯撤回大肆猖獗各摺片鹽關回匪猝犯徽境既恐繞道入陝綴我兵力見在鹽關雖已攻克而敗殘匪眾勢必蔓延尤應嚴密扼擊力圖撲滅惟兵力既難分撥都興阿等已飭徽縣激勵民勇會同陝軍嚴防力剿並飭徽縣兩當速辦糧米接濟著卽照所擬妥速籌辦並咨明劉蓉嚴防派出各員實力杜遏以固藩籬雷正綰進偪固原兼顧邠長汧隴等處聲威頗振儻能分兵會剿徽境一帶之賊尤爲妥協著卽斟酌情形與都興阿等商酌辦理楚豫捻匪由鄧州竄赴南召一帶陝境防務著都興阿咨明劉蓉懷遵疊次諭旨設法攔截毋令捻蹤闖入陝疆甯夏回匪狡詐獷悍朝廷早經鑒及前恐慶昫掉以輕心已諭令慎守滿城不可稍涉疏懈並諭都興阿穩慎進取毋墮賊計見在該將軍督飭各隊滾營進紮距

城不過十里內外偏賊愈近尤須慎重圖維務操勝算以期節節
進剿克復名城西甯撤回假稱投誠仍復到處焚殺前因玉通奏
到塔爾寺阿家呼圖克圖未肯散團已派官紳前往勸導當經諭
令玉通同情狡譎未可墮其撫計與都興阿此奏相合見在同氛
猖獗民不堪命漢民番僧人等自應集團防範以備不虞著玉通
遵奉前旨於撫輯之中隱寓防範之意務須聯絡番僧人眾妥爲
保護固不可啟釁生事亦不得狃於撫議墮賊奸謀俟甘省軍務
漸定卽著都興阿等分兵勦辦以靖地方將此由六百里各諭令
知之○予甘肅清水堡傷亡提督孟宗福祭葬世職加等諡勇烈
並賞三代封典○癸未諭內閣總理各國事務衙門奏請飭各省
地方官於中外交涉事件按照條約辦理一摺據稱江蘇麻莊地
方有英國人一名布國人三名搶取鄉村物件與民人互鬪傷死

鄉民三名被該處民人將該洋人等拏獲縛送地方官辦理乃該地方官展轉推諉並不收理以致延閣三日該洋人等被捆致斃二人已由該衙門咨行該省查辦等語各直省地方遇有洋人不持護照擅入內地及與民人爭鬪或有不法情事理應按照條約將洋人送交領事官懲辦此次麻莊地方互鬪一案若如所奏該地方官並不查照條約迅速辦理致洋人被捆多日遂致殞命實屬非是儻各省皆似此互相推諉畏事不辦尙復成何事體著各直省督撫嚴飭該地方官嗣後遇有外國人不持執照擅入內地及持有執照而或有不法情事抑或照內查有訛誤者均著按照條約拏交領事官懲辦其或官府未及覺察先由民間受害之家拏送者一經解到亦著按約就近送交領事官懲辦無論由官府民間拏送中途拘禁不准凌虐至中外一切交涉事件甚多並著

飭令該地方官平時將各國條約悉心檢閱不准視爲具文漠不關心致臨時多所舛誤○諭議政王軍機大臣等御史朱學篤奏黃流爲患請飭籌全局設法疏濬一摺據稱黃河自蘭儀決口河流北徙潰運河注大清河爲患甚重若於直隸之東明長垣山東之濮范等處強築隄防勢必橫漲入運則張秋以北盡變災區通盤籌畫亟宜先濬下游以殺水勢按大清河與徒駭河相表裏乾隆嘉慶年間屢經挑濬今之徒駭淤墊十倍於前自應挑濬徒駭俾黃流分入得以暢行下游旣暢則上游之隄即可節節修築至大清河兩岸土性易圻武定屬境探馬哨白龍灣等處險要異常宜築長隄以資保衛各等語所奏是否可行著閩敬銘詳細查勘酌覈辦理該御史另片奏請依照海塘捐輸事宜在山東省城設局收捐以濟要工等語並著閩敬銘體察情形奏明辦理原摺片

均著鈔給閱看將此諭令知之○諭沈桂芬奏豫省匪勢漸近晉疆酌調官兵並暫畱楚勇嚴防一摺前因張之萬奏賊擾魯山窺伺河陝當以時交冬令河冰凍結恐匪蹤易於渡河諭令沈桂芬設防茲據奏稱見在蒲州等營調派兵丁一千名就近添防羅承勛管帶二起楚勇赴甘肅經渡河飭令折回暫駐茅津添調太原平陽等營兵一千赴永濟一帶防範澤州防兵早撤見已籌兵備調等語布置尙屬周密惟晉省兵丁向多孱弱此次沈桂芬派出防兵務須揀擇精壯可用者方不至有名無實和昌旣駐茅津著飭令整頓各營將各處緊要渡口嚴密梭巡多設偵探與羅承勛併力協守毋稍大意賊旣北趨魯山漸偪秦晉僧格林沁張之萬當已相機兜剿扼其入陝其可竄入晉省之路尤應派兵截擊毋令闌入擾及完善是爲至要將此由四百里各諭令知之○諭王

通奏遵復郡城並未破圍惟漢番回民械鬪尙未肅清一摺西甯回民辯教啟釁嫌隙甚深見雖名爲投誠而尋仇械鬪兩造各執一詞其禍源仍未稍塞王通當恪遵疊次諭旨將城守事宜妥籌布置不可稍涉大意至漢民番俗人等集團備禦正可藉挫回匪之鋒斷不可徂於主撫悉令解散致墮回匪奸計見在都興阿雷正綰等分勦甯夏固原之賊疊獲勝仗陶茂林帶兵入省曹克忠攻克鹽關已與雷正綰合兵一處甘省軍威丕振賊膽已寒西甯等處回民度必聞風震懾王通務當因勢利導散其黨與息其紛爭以安疆圉將此由六百里諭令知之○命各省立限查覈捐輸數目造冊請獎○以英元爲內閣學士由大理寺少卿遷○甲申上臨故惠親王第賜奠○諭內閣朕叔祖惠親王老成敦厚恩禮疊加力矢靖共忠勤卓著本日朕親臨賜奠悲惋實深特申優眷之忱

益篤展親之典其子奉恩鎮國公奕詳前已有旨令於百日孝滿後承襲郡王著再加恩卽行賞食全俸不入八分鎮國公奕詢奕謨均著加恩晉封奉恩鎮國公至殯送之日著派醇郡王代朕前往賜奠並著送至園寢再行賜奠以示篤念懿親有加無已至意○諭議政王軍機大臣等都興阿奏逆賊糾集悍黨撲犯營壘堵剿獲勝並撥營進紮一摺回逆糾集馬步悍賊直撲都興阿營盤官軍連環槍礮迎前衝擊逆勢不支紛紛潰敗官軍追至甯郡城邊該逆豫伏馬賊分股包鈔馬隊官弁小有傷亡北路之賊徑撲穆圖善營盤亦經擊退擒斬不少據獲賊供稱該逆由靈州調到援賊四五千名又由固原調到悍勇馬賊一千數百名此次出賊幾及二萬各營以少勝多尙屬奮勉都興阿以賊勢日增宜乘勝進剿已令各營及穆圖善親兵等營前進並調參將趙有勝等相

機進紮以圖攻勦自係審時度勢利在速攻未可稍涉拘泥惟賊眾且悍伎倆狡獪該將軍等務當通飭各營於勇往之中加意穩慎以期萬全無失雷正綰屯兵固原節節進逼固原賊既已分援甯夏則該處賊勢較鬆該提督應趁其空虛之時派兵迅速進攻如固原軍事已鬆並著派兵協同都興阿穆圖善攻拔甯夏漢城盡殲醜類該將軍提督等務須聯絡聲勢毋致爲賊所乘是爲至要將此由六百里各諭令知之○諭張凱嵩奏髮逆句結苗匪竄擾黎平見飭粵軍援勦一摺李七股匪自貴州永從縣境退紮丙梅高增等處與粵西之懷遠羅城等界處處可通該逆與苗匪聲勢聯絡負固自雄見由三崗竹坪竄去並據黎平府報稱逆匪由菁崗竄抵潘老廠地方距府城僅三十里張凱嵩所派駐防懷遠羅城之楊廷桂一軍已陸續拔營進援尙能不分畛域此股逆匪

不過三四千人惟黔地苗寨如林與該逆蛩駘相依久爲黔楚粵三省之患楊廷桂一軍僅止五營進剿難挫兇鋒非合三省之兵同時並舉不能大張撻伐憚世臨前奏俟東防肅清擬籌大舉入黔見在江西肅清該省無東顧之慮所有援黔兵勇諒應早已籌及著該撫卽行揀派大員統帶大枝勁旅迅速分道入黔會合楊廷桂及黔省官軍妥籌夾擊務將黎平等處苗匪髮逆盡力殲除廓清黔省下游卽以保全楚粵邊圉毋得因循觀望徒託空言致誤戎機勞崇光張亮基身任封圻本省地方幾成盜藪豈能盡誣客兵不思振作著卽迅速調派得力兵勇咨會楚粵官軍聯絡聲勢力圖埽蕩肅清邊境毋稍玩延其楚粵界連黔省地方仍著該撫等扼要嚴防毋令該逆被剿紛竄擾及完善將此由六百里各諭令知之○廣西巡撫張凱嵩奏勦辦象州慶遠等處土匪擒獲

逆首得旨所辦甚好仍飭各該地方官搜捕餘匪務期淨絕根株
來賓賓州股匪著嚴飭蕭榮芳等軍認真剿洗毋畱餘孽○乙酉
諭議政王軍機大臣等恩麟奏陶茂林一軍收復金縣進紮省垣
分兵進援靖遠會籌布置一摺陶茂林所部由通渭縣進剿中林
山等處賊匪沿途乘勝掃蕩疊有擒斬並解安定縣城之圍餘匪
向會甯一路奔竄官軍正擬分途搜剿因金縣被匪襲陷省防喫
緊陶茂林親督諸軍由新營清水驛兩路鈔入金縣會合恩麟所
派之果義營等軍整隊環攻立將金縣縣城克復剿辦甚屬奮勉
陶茂林克金縣後進抵蘭垣因靖遠尙被賊圍派提督高餘慶等
五營與副將王德恆等相機夾擊卽著陶茂林檄飭諸軍迅解靖
遠之圍其分駐金縣清水驛甘草店各營俟各該處稍爲鎮定卽
由陶茂林統帶進規河狄等城擇要進剿河州回匪聞官軍將至

甘詞乞撫緩我師期恩麟與陶茂林會商暫予牢籠以紓兵力自係一時權宜辦法仍當慎密防維毋墮狡計賊蹤剽忽靡常東路靜甯會甯等境要隘亟須添兵扼守曹克忠一軍應否移紮靜甯適中之地爲陶茂林後路聲援著都興阿穆圖善雷正綰妥籌調派都興阿等督隊進攻甯夏直隸郡城利在速攻仍著懍遵前旨穩慎進取以期萬全無失雷正綰仍遵前旨迅拔固原卽可派兵協同都興阿穆圖善攻克甯夏漢城悉殲醜黨以靖地方將此由六百里諭知都興阿穆圖善雷正綰並傳諭陶茂林恩麟知之○諭恩麟奏請飭曹克忠專顧甘境及請飭四川等省協撥省垣餉需並飭各省速解慶陽協餉各摺片曹克忠一軍已將鹽關回逆老巢攻克秦州境內一律肅清正可乘此銳氣責令進剿若令回顧陝疆則陶茂林後勁無人東路又虞匪竄著劉蓉就近另籌防

兵以顧邠長汧隴一帶俾曹克忠專顧甘境免致鬆勁所有該總
兵營軍火餉需仍著劉蓉懷遵前旨照舊供支金縣等處賊匪雖
已遠颺蘭垣解嚴但甘省餉需支絀異常其大宗餉項不能不仰
給於他省著駱秉章沈桂芬劉蓉隨時籌款源源撥解不得各存
畛域之見以維大局雷正綰停兵日久士卒艱窘萬狀雖撫馭多
方時虞譁潰所有前諭令四川山東山西河南各督撫協撥慶陽
糧臺之款著駱秉章閻敬銘沈桂芬張之萬迅速按照原撥數目
無論何款剋日撥解慶陽糧臺源源接濟毋稍延誤並著文煜楊
能格一面咨催一面派員迎提以供要需將此由六百里諭知駱
秉章閻敬銘沈桂芬張之萬劉蓉文煜並傳諭楊能格知之○諭
常清明緒奏烏垣滿城失守添兵助剿伊犁緊急請派員出關會
剿並畱明緒商辦軍務各摺片此次摺報遞到較遲所有防剿機

宜著明緒懷遵十二月十一日寄諭妥籌辦理常清等請派大員帶兵馳赴伊犁會籌勦撫並飭部無論何款迅籌餉銀數十萬兩撥交帶兵大員見在署浙江提督一等子爵鮑超請假回籍昨已有旨諭令該署提督於假滿後率領所部自川起程由甘出關勦辦並諭令官文等將鮑超一軍月餉迅速籌撥該署提督勇略過人戰功卓著前在內地勦匪所向無前鮑超出關後定能掃蕩逆氛廓清邊圉也都興阿穆圖善規取甯夏亦極得手郡城指日可拔亦可騰出兵力出關進勦明緒惟當懷遵前旨慎固封守一俟大兵雲集即可大張撻伐毋得稍有疏虞常清請將明緒暫畱伊犁自係尙未接奉明緒補授伊犁將軍之旨卽著明緒於應辦公事及軍務事宜實心經理以副委任喀什噶爾英吉沙爾和闐葉爾羌等城實在情形明緒務當設法偵探是否業已失守確切查

明方可次第辦理力圖恢復邁維木雜特帶領同兵如能得力卽著明緒責令該己革阿奇木伯克妥爲管帶協同勦洗烏科二城蒙兵口糧著明誼就近籌畫隨時接濟甘肅向存副茶數百萬塊此時伊犁餉需萬分支絀而所撥之餉俱未能解到著恩麟將所存此項副茶派員由北路草地撥運數十萬塊解交伊犁以備搭放兵餉之用口外茶葉貿易極爲流通而科布多一帶設立臺站商賈行走亦無梗阻據常清等奏該商民如沿途以茶葉布匹換易羊畜實爲兩便商販果能接踵而至銀錢轉輸於軍餉較有裨益等語著德勒克多爾濟沈桂芬宣諭口內商民廣爲招徠令其前往貿易以資周轉將此由六百里諭知明緒明誼德勒克多爾濟沈桂芬並傳諭恩麟知之○丙戌諭內閣刑部奏遵議己革臬司李元度情罪定擬具奏一摺己革浙江按察使李元度前於逆

賊由皖南江西紛竄湖北時該革員由平江通城尾賊而來並未與賊接仗賊去後輒飾報勝仗克復城池迨經曾國藩奏効落職後該革員復悻悻求去稟請左宗棠將隨勦隊伍全行遣撤並倡索欠餉尤屬不顧大局罪有應得李元度著照該部所議從重發往軍臺效力贖罪○諭閩敬銘奏東省舊案交代一律算清查如初案虧缺各員開單請旨革職查鈔監追一摺山東各屬交代案件自清查以後因籌辦防勦延閣日久積壓過多經該撫督同藩司局員逐案句稽自道光二十七年十二月二十七日清查以後起截至咸豐五年十二月三十日止共計六十五案除捐攤例不計參外實在短交正雜倉款等項銀兩竟至六十萬餘兩之多該員等或已身故或轉徙他省潛回原籍以致帑項虛懸實屬大干法紀亟應從嚴懲辦以肅官方所有單開之前任益都縣知縣龔

璉等五十一員均著卽行革職該員等任所貲財並原籍家產均著查鈔備抵由各該督撫咨照山東巡撫彙總具奏並定限分別銀數監追儻限滿不完卽著嚴參治罪其業經病故者查明有無子孫出仕著落完繳其舊案二三案虧空各員仍著聞敬銘一併查明參奏該省交代經此次查辦以後自同治三年五月起所有各州縣應解上下忙錢糧著該撫設法稽覈不准絲毫帶欠以重庫款該省歷年辦理交代遲延該撫奏稱實因軍務倥傯所致所有同治三年四月以前各案遲延逾限處分均著加恩寬免○諭議政王軍機大臣等錢霖等奏偵探烏魯木齊各城失陷情形並派蒙古官兵前往會剿暨請准茶布商民改道來塔暫緩查辦分界等摺片塔城見懸一隅防兵較單雖見在尙屬靜謐而賊氛正熾深慮蔓延著錫霖等妥爲彈壓隨時撫輯以保地方見調之厄

魯特蒙古各兵著飛咨伊犁將軍明緒派員管帶前往助剿口內
茶布貨物向由歸化城起運由草地運至古城逐漸來塔自烏魯
木齊失守後道路梗塞塔城經費支絀均賴徵收商稅藉資補苴
著照該大臣所請令該商民等將茶布貨物由歸化城草地新設
臺站聽該商等自雇駝馬運至科布多轉運來塔以便隨時銷售
著德勒克多爾濟發給該商民路票沿途一體遵照俾利進行塔
城分界事宜著春融雪消時卽行派員前往各處詳加履勘務須
堅守條約格外慎重一俟查勘明確時卽行繪圖貼說呈覽將此
由五百里各諭令知之○丁亥諭議政王軍機大臣等蔣益澧奏
閩省軍情喫緊派兵扼紮浦城衢州並勘明塘工酌籌辦理情形
各一摺劉典一軍前據沈葆楨奏有先勝後挫之說茲蔣益澧奏
接左宗棠咨稱劉典在揚坊等處失利是我軍屢挫賊勢披猖閩

省軍情萬分喫緊蔣益澧見派劉清亮帶勇三千人移紮浦城擇要扼堵聽候左宗棠調遣並派余朝貴率領新湘五營填紮衢州與浦城一軍聯絡聲勢兼護糧道所籌均合機宜左宗棠駐師延平想自能督率諸軍迅圖掃蕩其泉州一帶及省城防守事宜並著徐宗幹會同左宗棠妥籌布置劉典一軍失利情形著左宗棠查明具奏蔣益澧見委遊擊張政順等前赴甯波募勇訓練以便騰出兵力赴閩助剿應如何調撥之處著左宗棠等斟酌妥辦其浙省毗連閩境並著馬新貽蔣益澧實力籌防毋稍大意海塘工程既據蔣益澧親自履勘查出尤險工三千八百餘丈最險工四千三百餘丈自應先行修築以衛民生第柴埽各工樽節估計亦須四五十萬金蔣益澧見在委員勸辦米捐彫瘵之餘恐難集成鉅款著李鴻章派員勸諭蘇松太所屬殷實之戶量力捐助俾得

早日興工於江浙兩省地方均有裨益本日曾國藩奏到李秀城親供內有堂弟李侍賢之母及其家眷爲蘇州李撫營漂陽將兵帶去寬養厚待欲收我弟之語是否實有其事著李鴻章查明覆奏將此由五百里諭知左宗棠徐宗幹李鴻章馬新貽並傳諭蔣益澧知之○予湖北殉難巡撫陶恩培建祠○予安徽陣亡典史孔憲天祭葬世職○戊子諭議政王軍機大臣等左宗棠等奏官軍偪攻龍巖扼守漳平獲勝暨由連城進剿先勝後挫見籌剿辦情形毛鴻賓等奏越境赴援詔安乘勝進偪雲霄見仍防剿兼籌並請調馮子材督辦東江軍務吳全美請假回籍各摺片逆首李侍賢仍踞漳州汪海洋踞長汀連城上杭交界之南陽鄉劉典一軍新挫逆勢狃該督所籌辦賊之法先取遠勢漸偪漸近驅令歸併一處然後合力蹙之實爲切中機宜見在王開琳王德榜兩

軍計可抵汀賴長等軍經康國器調赴雁石趙均所部亦已嚴扼漳平此路兵力較厚著左宗棠徐宗幹妥籌布置務期聯絡聲勢先將汪逆巨股殄除以期進逼龍巖劉典退保連城之軍尤當穩慎進取毋再疏失漳州城外地勢平衍自林文察敗沒後附近村莊多爲賊脅高連陞一軍見紫萬松關瑞香亭一帶以扼漳州東路黃少春一軍馳赴長泰扼漳州東北一路該逆堅匿不出伺隙圖逞乃其慣技左宗棠務令各軍深溝固壘先爲不可勝以待賊之可勝其漳軍後路及泉廈門戶須節節布置嚴密毋致爲賊所乘閩省賊勢甚重該處兵力恐有不敷江南見已無警著李鴻章於蘇省防兵內酌量抽撥礮隊赴閩歸左宗棠調遣李鴻章所部除劉銘傳一軍已赴豫省外此外該省得力兵將左宗棠如須添調卽一面檄調一面奏聞以資協助毛鴻賓等奏官軍赴援詔安

乘勝進逼雲霄惟龍連汀杭一帶界連漳州不能不防其回竄該督撫見飭李福泰往來嘉應惠州之閒相機調度方耀一軍由武平進紮上杭之蚌蛇渡先顧上杭進規永定鄭紹忠一軍駐紮上杭之峰市與翟國彥方耀等聯絡策應所籌尙妥賊謀甚狡伺隙卽逞著卽飭令李福泰督飭諸軍相機會合進剿務先嚴防本境門戶毋得稍有疏虞賊如不得逞志於閩必將全力趨粵馮子材前經請假回籍修墓曾令其假滿後赴廣西提督本任該員久歷戎行深明韜略廣東形勢岌岌自應保衛桑梓馮子材著暫畱廣東省督辦東江軍務並無庸俟假滿卽馳赴大埔饒平之交擇要駐紮堵剿漳州大股踞逆李福泰俟馮子材到防後再行回省吳全美統帶師船回粵著賞假三箇月回籍修墓福建軍務緊要著毛鴻賓傳知該提督假滿後卽馳赴福建水師提督新任毋庸來

京陛見毛鴻賓等片內所稱據總稅務司赫德面稱適見新聞紙
旨侍逆李侍賢見踞漳州句串洋人幫同襲取泉州進襲福州約
將海口通商地面讓給洋人等語原不足據以爲信而各處流氓
鬼子希圖勾結罔利亦事所或有請飭福建防範並飭總理衙門
照會各國駐京公使轉飭駐紮閩省洋官及領事官等約束商民
各等情本日已諭令總理各國事務王大臣妥籌辦理著英桂徐
宗幹嚴飭所屬妥爲稽查如有外國流氓勾結生事拏交各國領
事官從嚴懲辦泉州等處防務並著飭令地方文武認真辦理毋
稍大意毛鴻賓郭嵩燾另片奏香山富民陳守善徐瓜林二戶皆
以依附洋人致富始而避居澳門繼而避居天津此輩挾貲既富
聲氣易通謠言之興未始不由於此見飭查拏究罰等語捐務之
興原係朝廷不得已之舉必須準情酌理多方勸諭方可以免怨

尤若派捐勒捐自不免人言藉藉該督撫以此大謠言之起謂苛派擾民逼迫各富戶遷徙澳門香港查訪不得主名疑爲陳守善等所爲欲行拏辦該富戶等坐擁厚賞一味慳吝雖屬可惡然朝廷有寬大之體遽加以造言之罪查拏嚴懲恐弭謗適以召謗該督撫仍當斟酌妥辦未可一意孤行致失人心將此由六百里各諭令知之○諭劉蓉奏東路匪偏陝疆見籌派兵集團分防要隘請將工程處銀兩展限籌解各摺片豫省髮捻由鎮平竄南召之白土岡及鎮內交界之馬山口等處並有赴河南府過年再圖入陝之信賊勢愈趨愈近與商一帶隘口繁多亟應力籌防禦以扼該逆西竄之路劉蓉見派鄂太愚等駐紮富水等關並聯國協剿以壯聲威均著照所擬辦理前諭官文如賊勢西趨陝疆酌派勁兵越境兜擊並以蔣凝學見紮商城諭令僧格林沁酌量調遣茲

據劉蓉奏請分撥蔣凝學一軍繞赴浙川駐紮荆子關爲繞前截擊之師於浙川鄖西兩路均可兼顧等語見在蔣凝學未知由何路進剿應否卽令該道進紮荆子關或另騰出兵力前往扼紮以固秦疆門戶之處著僧格林沁官文通籌全局妥籌辦理劉蓉仍當就本省兵勇力遏賊氛不得專待鄰省撥兵一味株守致令無賊之區又被蹂躪陝西欠解工程處銀九萬兩據劉蓉奏稱該省殘破太甚未便急切追呼請展限籌解並請將林壽圖一併議處該省被擾甚久未能依限解清亦屬實情所請將該撫暨藩司林壽圖一併交部議處之處均著加恩寬免並准其展緩三箇月於明年四月以前埽數完解惟定陵工程緊要經此次展緩之後務當依限解清毋得再事延緩前諭僧格林沁將李成謀一軍調赴豫省助剿茲據左宗棠奏閩省賊氛正熾請飭李成謀速赴漳

州鎮總兵本任等語著官文卽飭李成謀迅赴新任並酌挑所部水師得力弁丁隨帶赴閩以利攻勦將此由六百里各諭令知之○陝西巡撫劉蓉奏派援階州各軍見籌會合兜勦得旨著卽飭令黃鼎蕭慶高等會合川隴各軍相機圍勦迅圖克復其階南竄川要路及北山諸隘尤應嚴密扼守毋任紛竄○予福建陣亡副將盧華勝浙江陣亡同知馬桂林等祭葬世職○己丑諭內閣前因宗人府奏見襲鄭親王承志原領不入八分輔國公分內甲數均應裁撤見襲不入八分輔國公岳靈仍襲原職分內甲數毋庸增減當經降旨允准茲據奏稱查明鄭親王承志前在不入八分輔國公爵內並無領過甲數無甲可裁應毋庸議惟岳靈前次授封時曾經照例給與甲數見奉旨作爲承襲承志所遺之職其分甲數是否按照承志前職原無甲數之案將岳靈原領甲數裁撤

抑照見在應有甲數之例仍將岳靈原領甲數酌畱請旨等語岳靈前授不入八分輔國公時原領紅白甲數著毋庸酌畱卽於鄭親王承志應得甲數內劃出護軍領催紅甲四分白甲十六副分給岳靈承領著爲令○諭禮部奏琉球國使臣呈稱該國世子此次恭進方物懇照道光二年六年咸豐元年五年准予賞收免其畱抵等語該國世子因慶賀登極並進文宗顯皇帝香品專遣使臣呈進方物前經降旨畱抵下次正貢原以昭體恤而示懷柔今據該使臣等呈稱伊等臨行時該國世子諄屬懇請准予賞收免抵下次正貢具見抒誠效悃誠懇可嘉著照所請此次所進方物准予賞收下次正貢屆期該國遣使來京時再當優加賞費用昭柔惠遠藩至意該部卽傳諭該使臣令於回國時轉告該國世子知之○僧格林沁奏據報髮逆捻逆由南召竄魯山縣以北梁

窪楊樓及寶豐縣以西張八橋一帶盤踞臣於十二月初五日督帶馬步各隊取道郊縣初九日進紮寶豐令總兵郭寶昌張曜等分道進攻因限於地勢未能得手必須步步爲營乘隙進取臣晤撫臣張之萬籌商進剿機宜非近賊安營日夜規取不能制賊之命而我軍見無帳房駐軍總在十里以外出隊奔馳已有貳逸我勞之勢因屬張之萬多備帳房作速解營以資應用一俟帳房解到卽令各營步隊偪賊紮營相機攻擊並飭張曜等督帶隊伍由魯山向梁窪一帶進剿以牽制賊勢使其首尾不能相顧而收夾擊之效至臣疊奉諭旨飭令劉連捷劉銘傳等軍探蹤前進歸臣調遣仰見宸謨廣運厚集兵力之至意惟聞此二軍守則有餘戰則不足似可暫緩來營臣查各營中紀律嚴明打仗得力者惟提督姜玉順一軍業經札調來豫協同進剿並擬調英翰所部副

將黃秉忠同知史念祖管帶兩營步隊來豫助剿再臣前見徐州鎮總兵詹啟綸所帶勇隊頗稱驍勇相應請旨飭令總兵詹啟綸選帶勇隊三千名迅速來營台以黃秉忠史念祖兩軍與各路官軍勦辦髮捻股匪庶可迅殄賊氛上諭議政王軍機大臣等逆賊竊聚張八橋梁窪等處經僧格林沁派令郭寶昌張曜等分道進攻因限於地勢尚未得手必須步步爲營乘隙進取該親王擬俟帳房解到偪賊營著卽督飭郭寶昌等穩慎進兵不得稍有疏失張曜一軍著僧格林沁張之萬督令將梁窪賊壘攻拔使該逆首尾不能相顧自可收夾擊之效該親王營內需用帳房軍械等項著張之萬督飭趕緊運解以資利用姜玉順一軍前已有旨令其赴豫著官文卽行嚴催令赴豫省協勦歸僧格林沁調遣毋任宕延劉連捷劉銘傳等勇隊疊在江南克復城邑均是百戰勁

旅卽不令當前敵亦可調令防堵要隘藉壯聲援俟該提督等到營仍由僧格林沁酌量調派詹啟綸前經請假回籍修墓業經賞假三箇月計期尙未起程本日已諭知富明阿令該總兵挑選精銳勇丁三千名剋日赴豫如同湖北本籍卽著官文飭令趕緊赴豫其英翰所部之黃秉忠等二員亦經諭令喬松年飭令管帶兩營迅速赴豫俟豫省軍務肅清再令詹啟綸回籍陳國瑞見在何處能否出力著該親王量加驅策調遣該親王營中馬隊傷病不少實深厯念蒙古見有捐輸馬匹尙堪調用如須添調卽趕緊奏請撥解以利軍行將此由六百里各諭令知之○諭僧格林沁奏請飭英翰所部副將黃秉忠同知史念祖管帶兩營步隊來豫助剿徐州鎮總兵詹啟綸所帶勇隊頗稱驍勇並請飭該總兵選帶三千名來營等語見在豫省匪勢猖獗竄擾南召魯山該逆一入

山險非有得力步隊不足以資剿洗著富明阿檄飭層啟綸選帶精銳勇隊三千名速赴僧格林沁軍營俟豫省軍務肅清再行遵照前旨飭令回籍修墓英翰部下黃秉忠史念祖管帶步隊兩營尙能得力著喬松年飭令星馳入豫迅赴僧格林沁軍營均聽候該親王調遣以資厚集而利攻剿將此由六百里各諭令知之○諭憚世臨奏黔匪環逼楚邊官軍力戰獲勝見籌防剿情形一摺黔省苗教各匪分擾楚邊經官軍由涼傘一帶分路環攻賊始卻退仍占踞蒲洞凱寨等處並有零股窺伺青谿玉屏印水等處周洪印乘賊蹤下竄直搗寨秧老巢當將賊巢焚毀餘賊相率遠遁沅州邊境雖暫獲安靜而賊勢由大魚塘以至涼傘蔓延數十里之廣黎平苗匪復句結髮逆竄逼靖州老號匪又由印江分股下竄銅仁屬境楚邊俱形喫重著憚世臨迅檄彭炳武于高勝兩軍

由寶慶速赴沅防並飭周洪印滕加洪等酌添勇丁周密布置以資捍禦母任賊蹤復行蔓延戈鑑一軍業經馳回靖州卽著飭令擇要扼紮妥籌防勦母稍疏懈前因廣東軍事方殷諭令趙煥聯統帶所部入粵助勦見在廣東毗連江閩各境已無賊擾楚省邊防緊要賊勢飄忽東面亦難遽行撤防趙煥聯所部各營著仍暫畱湖南分駐江楚邊隘俟湘省邊界靜謐卽遵前旨飭令該臬司迅赴滇臬本任以重職守將此由五百里諭令知之○調黑龍江官兵五百名交聯捷統帶出關○予故都察院左副都御史張弔於渭南倉頭鎮建祠○予浙江閩門殉難知縣許承岳建祠○庚寅諭議政王軍機大臣等楊岳斌奏湘勇起程日期並請飭發協餉及派員募勇情形一摺據稱接准部咨知甘省協撥餉銀已有成議而湖北防務已鬆卽飭安肅道蔣凝學等先期帶兵赴甘該

軍馬步七千八百餘人甘省得此一軍可以稍厚兵力惟該營每月需餉銀四萬餘兩食米四千餘石必須按月接濟請飭都興阿轉飭慶陽糧臺先將部議協撥楊岳斌軍營之款暫濟該道軍餉至各省協餉已准江西江蘇各解到三萬兩飭總兵彭楚漢等招募湘勇一俟訓練成軍卽當統帶赴甘各等語前因蔣凝學一軍駐紮商城諭令僧格林沁酌量調遣復因髮捻各逆駸駸西趨諭令僧格林沁等斟酌情形飭令蔣凝學駐師荊子關實力扼紮是該道員所部馬步各隊尙未能剋期赴甘楊岳斌惟當趕緊募勇成軍認真訓練並咨催各省欠撥之餉以期資糧稍足卽日成行迅赴甘省俾得騰出兵力出關剿賊以靖邊陲蔣凝學一軍如有赴甘之期卽著都興阿文煜楊能格由慶陽糧臺支發餉銀毋稍缺乏將此由五百里諭知都興阿楊岳斌文煜並傳諭楊能格知

之○諭駱秉章奏官軍越境攻勦階州踞逆疊獲勝仗催兵進勦一招據稱周達武江忠淑各率所部進徧階城該逆分股於城外築壘抗拒蔡逆親帶黃衣悍賊出城死鬪周達武督飭各營分兵疊擊奮力衝入賊陣賊眾大亂蔡逆墮馬被黃衣賊搶護入城僞巡捕蔡四逆亦被勦奔入城中其由城西涉淺過河築壘之賊經江忠淑督飭各營分路截殺斃賊無算該兩軍雖連戰皆捷而兵力不敷未能合圍湘果兩軍並陝省之英毅親兵各營嚴催未到惟彝字營已馳抵柳壩各等語川軍新到卽能力挫賊鋒著駱秉章仍檄周達武等軍乘勝進擊務須一鼓作氣將踞逆悉數殄除以清餘孽參將劉鶴齡所部一千七百人由畢口馳赴階州南岸並催令前進會合漢軍聯絡兜勦昨據劉蓉奏湘果軍蕭慶高等與右軍各營分紮北山諸隘催英毅一軍扼阻舊城衝要遏賊由

柳壩一帶出竄之路而階南竄川要路見有武字達字兩軍分兵扼守見飭會合川隴各軍相機圍剿各等語是駱秉章具奏時尚未得陝軍到齊之信見在川陝各起勁兵業經雲集著卽督飭各將士合力兜擊迅拔堅城劉蓉尤當嚴飭湘果等軍會同周達武等認真痛剿不得專恃川兵稍形疏懈將此由六百里各諭令知之○予甘肅陣亡參將廖德成等祭葬世職○辛卯諭議政王軍機大臣等官文吳昌壽奏長陽縣刁民聚眾滋事派兵搜捕一摺據稱湖北長陽縣土司後裔田士信卽田思羣並李明德覃其烈等糾黨橫行並長樂縣差役王啟幅等均因案畏罪在長陽縣境結夥意圖拒捕膽敢在四方臺山搶擄銀錢並將該縣派往協緝之族長田青遠等殺斃劫其財物製造刀矛狡焉思逞經宜昌鎮總兵葉永泰撥兵往剿並經官文派令都司曹立全等抽撥礮船

駛赴宜都縣小河口堵截該逆糾眾於十一月二十八日繞至王臺子坳地方經曹立全出隊迎擊隨卽敗退該匪復由鴨子口偷越官軍往捕斃匪數十名將夥匪李明德覃其烈擒獲正法因山路積雪尙未擣其巢穴見加派唐協和統帶四營添撥礮船聯絡勦捕並飛咨湖南巡撫飭屬嚴防等語該犯田士信等以土司後裔肆行無忌並敢聚眾殺掠恃險拒捕實屬目無法紀若不及早撲滅必致釀成巨患著官文吳昌壽嚴飭派出官兵弁丁會同該地方文武員弁迅速勦捕將該匪等悉數殲除不准一名漏網該處與湖南接壤並著惲世臨迅飭所屬各員於交界處所一體嚴防密速兜勦毋任竄越將此由六百里各諭令知之○壬辰諭議政王軍機大臣等林鴻年奏籌辦迤西請撥軍餉並請撥湖北湖南釐金調員差委馬榮就揜各摺片據稱曲靖地方業已就撫迤

東如果安堵卽應進剿大理該撫已札飭楊盛宗自選兵練西出大姚永北一路聯絡川省之會理鹽源各邊民團約會馬如龍等分路進剿規取大理該撫居中調度亟須精練數千爲各路聲援請飭四川督臣轉飭藩司悉心籌畫等語見在馬聯陞伏誅馬榮已就擒獲池東情形尙爲得手著林鴻年卽飭楊盛宗精選兵練聯絡聲勢以圖節節進取唐友耕已授雲南提督劉嶽昭已授雲南藩司均無可卸之責著駱秉章體察川省情形如可騰出此二軍令各率所部入滇林鴻年再就近在川邊募勇訓練滇事自可日有起色惟師行餉隨駱秉章仍當籌銀數萬兩交林鴻年爲勦辦經費本日已諭令湖南廣東各督撫令其設法接濟並照林鴻年所請於湖北湖南令各撥釐金月一萬兩解滇該撫得此兵力餉力務當隨時與駱秉章勞崇光會籌妥辦認真進剿不得徒託

空言致負委任鹽井銅礦爲天地自然之利滇省餉源所自出該撫入滇後即可就地設法興辦爲自強之計將土夷各匪次第廓清至回匪叛服不常應大張撻伐不可輕易言撫致墮賊謀馬榮罪大惡極必須處以極刑以申國法解川解黔均無不可總當視道路之遠近通塞酌量辦理以免意外之虞林鴻年請調蔡步鍾毛震壽二員著交該撫帶赴雲南差委將此由六百里各諭令知之○諭林鴻年奏見籌進剿迤西回匪軍餉支絀請飭湖南廣東設法接濟並擬於川省設立後路糧臺請飭兩湖於釐金項下每月協撥銀一萬兩以一年爲期以利進行各摺片雲南回匪負隅已久非大張撻伐不足收剿撫兼施之效惟滇省利源皆爲逆回盤踞必賴鄰省協濟雖經川省設法籌畫而獨力亦復難支廣東前於同治二年奉撥協滇餉銀二十五萬兩僅據解到一萬兩其

餘絲毫未解著毛鴻賓郭嵩燾督飭藩司迅將欠解之二十四萬兩趕緊設法分起如數解交不准藉詞延宕並著俾世臨查明該省欠解滇餉共有若干迅速籌撥不得推諉貽誤至湖南湖北兩省釐金來源尙旺見在湘楚軍務無多自可酌量抽撥卽著官文吳昌壽俾世臨於各該省釐金項下每月各協滇省銀一萬兩自同治四年正月起以一年爲限卽行停止務須如數按期源源籌解不准稍有遲延帶欠將此由五百里各諭令知之○御史佛爾國春奏升科黑地流弊下直隸總督順天奉天府尹覈辦○癸巳諭議政王軍機大臣等前因賊由南召北趨魯山窺伺河汝諭令李鴻章迅檄劉銘傳所部星速馳赴豫境茲據李鴻章奏劉銘傳等營所用均係外洋軍火笨重異常請俟明春水長察酌入豫道路何處可通舟楫易於轉運再行相機調度等語劉銘傳赴豫旣

據該撫奏稱恐於大局無裨卽著無庸檄令前赴豫省閩匪日肆
彼猖前諭李鴻章於蘇省防兵內酌量抽撥礮隊赴閩歸左宗棠
調遣見在劉銘傳旣已無庸入豫而由蘇赴閩水道可通攜帶轉
運尙屬不難著李鴻章與左宗棠妥爲籌商如閩省應需該營前
往協勦卽著該撫檄飭劉銘傳統帶所部星速赴閩聽候左宗棠
調遣以資厚集而利攻勦將此由五百里諭令知之○甲午以裕
祭 太廟 上前期親詣行禮○諭內閣據前任詹事府右春坊

右庶子袁保恆由陝州馳遞摺報條陳屯田事宜並稱屯政事屬
枘輿法貴經久非筆墨所能詳亦非旦夕所能定如蒙俯采芻蕘
請躬詣京師與在廷諸臣當面籌商悉心妥議等語國家廣開言
路博采兼收中外臣工果能於政令急務確有見地原可剴切敷
陳用備採擇袁保恆上年條陳屯田事宜業經降旨交皖豫督撫

會議其如何因地制宜應准應駁理宜靜候督撫覆奏何得輒以
未見施行爲詞奏請躬詣京師與廷臣籌商定議況丁憂在籍人
員理應居家守制豈容與聞朝政袁保恆從前雖令其會辦陳州
團練亦並未令其專摺奏事何得行至陝州發遞摺報實屬自信
過深冒昧從事不諳體制袁保恆著交部議處○諭議政王軍機
大臣等常清明緒奏伊犁大獲勝仗立解城圍一摺伊犁回匪變
亂攻撲城垣前據常清等奏到方深廛繫此次明緒督派兵勇及
索倫哈薩克等出城接仗將回匪擊敗立解城圍覽奏稍慰回匪
兇悍性成黨與甚眾見雖被擊敗走尙未大受懲創伊犁餉絀兵
單回氛四逼若因此次獲勝防守稍疏深恐該逆勾黨尋仇必將
乘隙大逞明緒當懷遵疊次諭旨慎益加慎未可掉以輕心致有
疏失回匪見竄巴燕岱城據穆克登額報稱尙有數萬之眾圍城

緊急可見賊勢並未衰弱明緒見派額騰額等統帶各營進剿務當飭令穩慎前進不可稍有挫失致損軍威又復震動全局綏定等處賊匪退竄金頂寺城盤踞尤當虞其回擾設法防剿總在明緒相機籌辦一切均當持重以副委任所請飭催撥餉一節業已諭令戶部迅催撥解矣關內精兵先後調撥爲數已屬不少陸續當可出關將來大兵雲集定可迅速蕆事明緒當就見有兵力慎固封守以待援兵將此由六百里諭令知之○以伊犁解圍賞將軍明緒黃馬褂領隊大臣榮全花翎餘升敘有差子陣亡總管阿木爾們都領隊大臣托克托奈祭葬世職加等○予故欽差大臣琦善等入祀江蘇昭忠祠○是月豁免浙江瑞安縣被擾節年額賦蠲免江蘇太倉等六十七州廳縣暨淮安等九衛水旱被擾災區新舊額賦雜課蠲緩浙江山陰等二十八縣暨衢州等二衛水

旱新舊額賦河南鄭州等六十六州廳縣水旱雹災及被擾新舊額賦緩徵吉林雙城堡被淹屯地新舊額賦湖南澧州等十州縣暨岳州衛被水湖北沔陽等十八州縣暨武昌等衛水旱新舊額賦雜課展緩兩淮富安等十四場水旱災區折徵錢糧○是歲朝鮮琉球入貢○會計天下民穀數除江蘇福建雲南安徽廣西貴州浙江陝西甘肅等省未經冊報外奉天等省通共大小男婦二萬三千七百五十萬七千七百二十七名口存倉米穀三百十三萬六千二百八十八石七斗九升九合九勺